

Täkarde ta s-sänatät iktäb Buləs i- käl-Täslonika

Äšajəš

1 A-wa näkk, Buləs, hin-iktabän näkk d-Silwan d-Timoti i-älkänisät* n-Mässinäy-i n-Abba-nänäy d-Emäli Yisa* Älmasex* ta hät ayrəm wa n-Täslonika. ²Nähuul-käwän-in, nəttar dāy-Mässinäy-i n-Abba-nänäy d-Emäli Yisa Älmasex ad-käwän-äkf ännuymät d-älxer.

Äššäreya wa ilkämän afäl dd-iqqäl Älmasex

³Ayətma, hak ašäl nämmoy i-Mässinäy dāy-təssəba-nāwän, äniihäjjä a-wen ed itəhhal immun-nāwän s-data, tiwwaq day tārha ta tänimäjjäm jer-iman-nāwän. ⁴A-wen-dāy a dd-orāwän a-s wär t-təlla älkänisät* n-Mässinäy s-wädden nətabäräjä-as dāy-isälan-nāwän, ed kud-dāy, wär t-illa älyzabät wäla talya wär tənheyäm, təšbäräm, wär-ifnez a-wen wäla a əndärrän dāy-akuyəd-nāwän wäla immun-nāwän.

⁵Hakd a-wen-dāy, ayətma-y, a-wa käwän-irmäsän a ämoos-dāy, asəddəttu yas a ämoos n-a-s ilkam ašäl dāy-mad-išräy Mässinäy s-iqqud. Älyzabät käwän-irmäsän-dāy, wär-ämoos yas, ar a käwän-isinhäjjin d-ujəš n-Təmmənəya n-Mässinäy* ed Təmmənəya-net a fäl hannäyäm a-wa hannäyäm. ⁶Itbat a-s Mässinäy-i oyadän, wär-e äyy ere käwän-itayəzzäben äsunfa, ässilkäm dāy-s. ⁷Ilkam ad-käwän-äkf täsonfat, käwäned-i hannäyən älyzabät ašäl-i-dāy, äkf-anäy-tät näkkäned-dāy ašäl wa dd-e-infiləl Emäli Yisa* ifal-dd išənnawän, äddeew d-änjälosän wi n-iməşsuha. ⁸Ad-dd-iqqəl dāy-ammäs n-efew ähijäljälän, išəj eya dāy-äddinät wi has-äsyärnen ulhawän-näsän, unjäyən ämişəl n-a-wa innä Älənžil* n-Emäli-nänäy Yisa. ⁹Äddinät-en, təlkam dāy-sän tisanat səmmät d-teräzže täylälät jat dāy-anməjjaj d-Emäli d-tärna n-älxurmät-net. Wär dāy-sän ilkem ad-t-ənhayän. ¹⁰Ašäl-en dd-mad-ass Emäli, ad-səmyärän iməššeddəjän wi sār-s omännen älxurmät-net ed äsidawät-tän ass-net. Käwäned, äddinät-en, ham-tän ed tomänäm s-isälan wi hawän-näxtäb.

¹¹Ayətma, a-wen-dāy day a fäl hawän-nətattär s-Mässinäy hak ašäl, nətattär dāy-s ad-täqqayməm təttafäm tabarät ta dāy-käwän-ija, tənhejj tämudre-nāwän d-teyəre ta käwän-dd-ija Mässinäy s-iman-net, idhəl-käwän s-tärna-net i-ad-tamašäläm a-wa oläyän iket-

däy-net, umas immun-nāwān, immun ih' älfäyda. ¹² Emmäk-wen-däy a däy-mad-itwəsəmyār Emäli-nānāy Yisa däy-tämudre-nāwān, təkrašām idəm data-s däy-ännuymāt n-Mässināy d-Emäli-nānāy Yisa* Älmasex.*

Isälan n-uyəl n-Yisa Älmasex

2 Ayətma, hakd a-wen-däy ämära, däy-isälan n-uyəl n-Emäli-nānāy Yisa Älmasex d-ažəmmäy wa s-ilkam ad-t-nənməjj dār-s, nənn'-awān: ²tazidert, wār-itəggädət äwadəm wäl' iyyān d-ənniyāt-nāwān, wār säryasāt i-äwadəm wäl' iyyān ayāšad n-iman-nāwān s-a has-dd-änifalälän wāla s-a nənna wāla s-täkarđe hawān-in-nəktab däy-nənnā a-s ašäl n-uyəl n-Emäli äru dd-osa. ³Wār kāwān-isəswadət äwadəm s-wāla a əndärrän fäl-a-s ašäl wa n-uyəl n-Emäli, iket-di d-itäjj, ad-irməs iba n-äddin äsuksäqän äddinät äjjootnen təzzar ass-dd u-tanməšrayt wa s-itawānna Äddäžžal† he-ihlək Mässināy. ⁴Enta-endäy a-s ämakšar n-e d t-illām a ititwäybidän. Däy-tanməšrayt-net, ad-igləw har äqqayəm däy-ehän n-ämudd wa mäqqārän,* isigdäh iman-net d-Mässināy.

⁵Ajän tətəwäm-in a-wa hawān-ənnəy a-s t-älley yur-wān. ⁶Təssanām a-wa t-in-itəfän, a ikkäs day wār dd-äwweḍ ašäl-net, wār dd-e-ass. ⁷Təmyäre n-əddäraj n-iba n-äddin-net ixdam däy-äddunya-ta-däy, afäl has-dd-təssəlwäs tärna ta t-in-təṭfät fälla-nāy, ad-dd-infiləl a-wa t-išlän, os'-iwän fäw. ⁸Afäl dd-osa anämäšray-wen-däy, ad-has-dd-ilkəm Emäli Yisa*-i t-in-e-isähəqän s-tärna-net, ikkäs däy-s älfäyda iket-net s-tiyyät tashäqt n-emm-net. ⁹Ähaləs wa t-illän ḍarät-a-wen-däy, ad-t-äkf Iblis tärna s-mad-itäjj ijitän äsuksäqän, tikunen d-tišušab s-issəswäd tamətte, ¹⁰wār t-təlla tälläbäst d-iba n-iqqud s-wädden ad-t-äj i-ad-isəswəd äddinät wi hänen tabarät n-tanməšrayt s-əlhəllak yās a hasän-iqqalän, äsyārän ulhawān-näsän i-tidət ta lät s-ad-tän-täyləs. ¹¹Däy-təssəba n-a-wen-däy, a fäl hasän-išläy Mässināy, oyy'-en oḍän däy-a-wa tän-itakärrasän, išinməšrəy-tän. ¹²Ilkam ad-ənmənhəyän d-äššäreya ed ässofän bahu tidət, ässofän färräy, iqqud.

Təmayit d-tittar

¹³Ayətma-y, iwar-anāy hak ašäl ad-numay i-Mässināy däy-təssəba-nāwān. Emäli iman-net a kāwān-issəlmädän s-tārha-net, äsnäfrän-kāwān Mässināy, iyłäs-kāwān s-tärna n-Unfas Šäddijän,* iššəšdäj-kāwān i-ad-tumasām tamətte-net ed tomänäm s-tidət. ¹⁴Iyr'-iwän-dd

†2:3 Ämakšar, ašänjo d-eməkkənəs n-Älmasex.

s-iman-net i-ad-təsləm i-Älənžil* wa hawän-näxtäb, təjrəwäm ejäddär-näwän däy-älxurmät n-Emäli-nänäy Yisa* Älmasex.* ¹⁵Ayətma! A-wen-däy a fäl əkfärät i-Iblis, äknät uđəf n-älɣadatän wi käwän-nəssäyra s-imawän-nänäy hakd-däy s-tikarđiwen ti hawän-in-nəktäb.

¹⁶Emäli-nänäy Yisa Älmasex hakd-däy Mässinäy-i n-Abba-nänäy, tətbat tärha-näsän hanäy, əntäneđ a hanäy-əkfänen däy-ännuymət-näsän turhajät n-ad-näkk s-data, nəhləyləy härkuk däy-ättäma ädduutten.

¹⁷Nəttar däy-Mässinäy ad-iđnəy ulhawän-näwän tärha n-tikawt n-s-data, ija däy-wän älbäraka n-ad-tamaşaläm a-wa oläyän däy-ijitän-näwän hakd-däy däy-mäjräd-näwän.

Derhanän n-Buləs i-käl-Täslonika

3 Ayətma, tasämdot n-mäjräd-nänäy da: təddalät-anäy-in Mässinäy i-ad-ihəl mäjräd n-Emäli s-data šik däy-idäggan iket-näsän, səmyärän äddinät mäjräd-en s-əmmək wa s-t-tässimyäräm käwäneđ. ²Ädälät-anäy-in Mässinäy i-ad-hanäy-iyləs däy-erk imojjan n-erk äddinät d-inälläbäsän ed wädden äddinät iket-näsän a ətəfafnen immun.

³Emäli, oɣad, ənta-en-däy a käwän-e-isəşsuhun däy-immun-näwän, aɣəz-käwän däy-Iblis-i n-Anämsod. ⁴Emäli a ih' ättäma-nänäy däy-isälän-näwän, nəkkas äşşäk a-s a-wa dər-käwän-näsmätär, tətəfafäm-t, ad-t-təknəm day uđəf.

⁵Ij'-iwän Emäli däy-tabarät, ässewəđ Mässinäy tärha-net däy-ulhawän-näwän, ija däy-wän akuyəd däy-tazidert šund ta häť Älmasex.*

Äxdəmät, äyyät fälla-wän sendad

⁶Ayətma, näsimätär-käwän hullan däy-isəm n-Emäli-nänäy Yisa* Älmasex* i-ad-sənnəməjjəjäm iman-näwän d-ere ijannen ənta äŋŋa-wän däy-äddin, a-s ija a-wen, unjay s-ad-iттəf älyadatän wi käwän-nəssäyra, unjay s-älxidmət s-ifassän-net, tämişärşär tämudre-net. ⁷Tämudre ta tättilälät a-wa käwän-nəssäyra, təssanäm-tät; təssanäm a-s, a-s t-nəlla jere-wän, wär hanäy-təzzeyäm d-a-wärän oyed. ⁸Wär t-illa ere s-nəkša əsink-net bännan, ehäđ d-aşäl näxdam s-əşşahät-nänäy, tidət, nälluyyäy məšan, wär t-illa fäw ere s-nämoos əzuk. ⁹A-wen, nəj'-e, wädden i n-a-s innin wär-änhəjja d-ad-näkk isinkawän-näwän məšan, nässof ad-wär nəja a-wen, i-ad-hanäy-tättäläläm käwäneđ-däy, təlmədäm a-s älxidmət, a iwarän hak ägg-adəm. ¹⁰Äzzäman wa nəkkäs jere-wän, nəkna aɣəzəzəwi fälla-wän tənna n-a-s: «Äwadəm wa wärän irha ad-ixdəm, adiş, wär-itättet.»

¹¹ Kāwāneḡ, nəsla a-s han-kāwān äddinät ämišäršärnen wāren ərha ad-äxdəmān, tājǰāšān isālan wāren tān-dd-äqqel. ¹² Äddinät-en, nārha ad-nəsəmmäqq fälla-sān, nə səmmətār-tān: nəj'-asān isəm n-Emāli Yisa* Ālmasex* idəm n-ad-äxdəmān s-äššahāt-nāsān, əyyənet sendad i-ad-udaben uḡəf n-tāmudre n-iman-nāsān.

¹³ Kāwāneḡ-i n-ayətma-γ, wār kāwān-išälḡašet amišəl n-a-wa olāyān. ¹⁴ Isəmməterān wi hawān-nətājj dāy-tākarḡe-ta-dāy, ere sār-sān unjayān, əzzəyāt-t, širəšām fälla-s i-ad-ikrukāḡ, ¹⁵ wār t-jem ašānjo-nāwān, səmmäqqāt fälla-s šund āḡḡa-wān.

Tittar d-tihulawen

¹⁶ Ikf-iwān Emāli-i n-Māssi-s n-älxer, älxer s-əjut hak ässayāt, idhāl-kāwān Emāli iket-dāy-nāwān. ¹⁷ Tihulawen-ti-dāy, nəkk iman-in, Buləs a hawān-tānāt-in-iktābān s-äfuss-in; ešwāl-in dāy, dāy-tikarḡiwen-in iket-dāy-nāsnāt da-dāy. ¹⁸ Ähuulāy-kāwān-in, əttarāy dāy-Emāli-nānāy Yisa* Ālmasex* ad-kāwān-äkf ännuymāt iket-dāy-nāwān. Amin!